

任縣志序

古者循名必責實而劉彥和則曰意徵實而難巧是非謂實之不足重謂實之不易徵也人之修於己則貴實行實學及乎物則貴實心實政安往而不宜求其實者矧志乘所關將以彰文獻備掌故而可不考實以期垂之久遠哉任邑志重修於道光初年自後杳無賡續簡編缺如上湘謝君蓉墀蒞官斯土見其民情樸實男耕女織饒有唐魏遺風惟近年來人文不甚振起慨然引爲有司之憾爰集司訓陳君學愚並學警各員悉心蒐輯商榷校讎所有山川風土人情以及沿革建置藝文風節體例統以八門考證必歸於當採訪必求其真期無一端之不實

焉耳余前權順郡素佩謝君學道愛人實事求是今者修志猶是心也承以書索弁言自愧譾陋不文何敢撫拾貽作者羞然心心相印樂觀厥成至於志之能詳能實與否觀者當自得之而作者則盡心以求其實藉以存一邑之文獻俾觀風者有所考證云爾是爲序

宣統三年歲次辛亥孟夏四月中浣署保定府知事蘇完瓜
爾佳延齡謹撰

任縣志序

邑志始輯於有明隆慶元年再輯於我朝康熙十二年道光初復修之隆慶志久無傳本道光志又簡略無足採今所據惟康熙志而已自康熙迄今二百五十餘載時遷事貿紀載闕如蓋文獻之散佚久矣余以光緒乙巳之夏奉檄蒞任始至之日出郡城循牛尾河而東不三十里而至邑境於焉察其風土溝塍鱗次流水環通汲引以時頗稱膏沃東北環大陸平疇千頃雖時有積潦之害而以食其福者爲多東帶滏陽灌漑運輸農商均沾其利其民則男務耕耘女勤紝織山樞葛屨猶然唐魏之遺其士則遵律令敬長官循循規矩而相尙以儒素蓋邑東

連鉅鹿而無其愚悍之風北接唐山而無其刁健之習斯固一方之所獨美者也所不足者人文之振起耳當前明中葉此邦人士未嘗不有聲於時而乃以繼起乏人遂使先達遺型日遠日泯微論追蹤繼武甚有並其姓字弗識者今試與近溯國初訪劉霖蒼循良之績遐稽勝代緬趙含章蹇諤之風年代匪遙知者已鮮又况游太傅之芳躅遠在拓跋之朝張徵士之高標渺在當塗之世者乎固由家少藏書人無績學而亦邑乘殘缺無以昭示來茲故也余撫任六載百度粗舉憫士風之譴陋思有以引進之而傳記所載古人之嘉言懿行雖皆足啟發人心要不若生於其鄉者爲易觀感而興起也故莫如修志爲最

宜而以勞勞於期會簿書無暇從事司訓陳君學愚學優而文
美因以志事屬之採訪調查則委之學警各員爰以己酉歲四
月開局纂輯越十二月書成是役也固將稽掌故酌經常問民
風核物產俾生於斯者知所以鑒古而矯失吏於斯者知所以
通變而宜民而尤在發潛闡幽取老成典型作後進模楷庶高
山景仰人思奮發曷其所不足者益保其所獨美者斯又將來
之志所待以延譽而增重者也邑人士其勉乎哉若夫時勢既
殊理想亦從而稍異今志之作有不能盡同於昔者則義具例
言無俟余之贅論矣

宣統二年五月下浣知任縣事湘鄉謝昂麟序

修

明

志

天津華新印刷局印

縣之有志所以存掌故徵文獻兼以知人民之苦樂風俗之美惡者也顧或因兵燹之餘卷帙零落風雨剝蝕散佚無存則拾遺補闕誠官斯土者之責也任縣志書權輿於明隆慶元年再輯於清康熙十二年道光初葉復修之迨咸豐三年突遭洪楊之變志書版片悉付刼灰自是缺而未備者蓋六十年於茲矣前任湘鄉謝君蓉墀官任久以邑乘之闕如而無以昭示來茲也乃慨然以志事自任爰屬司訓陳君學愚實司編纂並督學警各員闡幽抉隱蒐討靡遺九閱月而書成義例燦然胥臻純美信足爲任邑光矣嗣因謝君陳君先後受代去且攜斯編丐序於前民政長劉原稿久未發還故遲遲迄未付梓去年秋余

奉檄知任縣事下車伊始輒以政治之良窳俗尚之同異以及疆域沿革水道變遷與都人士翻覆研究冀可以循名覈實獲洞悉其底蘊徒以志書烏有考鏡無資北望塔屹之臺西問長廊之柳俯仰徃徠亦僅得其形似已耳爰進紳耆而謀之略謂邑無志書不特學校禮制田賦兵刑犖犖大者欲考其興廢利病而莫由甚至一物產之微一藝文之末亦浸假而昧所從來今而不亟事補輯烏乎可况前因重修畿輔通志今因清史館纂辦地理志迭奉長官檄催賚送志書以資參攷是則編刻志書之舉更有不可須臾緩者諸紳耆以舊本之待鐫懼前修之難續無不翕然樂從用是以劉君書旂魏君華堂等設局籌

辦就謝君叢殘之副本各依門類撫拾而補綴之並詳請 直隸巡按使朱將志書原稿咨取飭發俾得與補編同付手民此則任縣志書告成之巔末也是役也創於謝陳二君劉魏諸君亦與有力而余得樂觀厥成贅名書尾藉以悉政治俗尙疆域水道今昔之不同其爲幸也何若顧余蒞任以來忽踰半載所晝夜焦思惓惓不忘者則以任邑九河下流失其故道大陸之墟陷爲巨澤陽侯每易肆虐居民病其漂沒尙無術以疏濬而拯救之又未免循覽志書而良深慚惡者矣

中華民國四年三月任縣知事山左王億年序

增補邑志序

一國有史一邑有志志與史相表裏者也史以載道道不外孝弟忠信禮義廉恥孔子之春秋紫陽之綱目胥是道也天不變道亦不變運雖變而天終不變守道而人羣以聚士習以端國體以立世界以成去道而人羣以散士習以敗國體以亡世界以滅史者道其所道故爲正史志者道史之道以爲道故爲良志世之趨新者動曰國體變矣君政變而民治古之所謂道非今之所謂道也依古而違今焉將迂闊而遠於事情矣其如道何世界變矣閉守變而交通中之所謂道非外之所謂道也尊中而薄外焉將因陋而昧於時勢矣其如道何不知道一而已

一者何也曰孝也弟也忠也信也禮也義也廉也恥也無古今
無中外一也故夫人情之變也物理之變也事實之變也而道
則不變準道以樹之鵠道合而褒之獎之表揚之激勵之以勸
善也以勸孝弟忠信禮義廉恥也道乖而貶之譏之禁絕之誅
滅之以懲惡也以懲不孝不弟不忠不信不禮不義不廉不恥
也此春秋之微意也亦綱目之大法也吾邑志重修於宣統末
造謝邑侯之所鑑定陳司訓之所編纂固已炳炳烺烺蔚乎大
觀乃未及鋟版而清社已屋二公亦先後去職今四閱寒暑矣
帝國去民國興開四千年未有之創局其間人情之變物理之
變事實之變參伍錯綜不知凡幾苟不重新補輯以明大道則

帝國之所尙或疑非民國之所宜將自由平等之學說愈沿愈誤其何以教孝教弟教忠教信教禮義教廉恥以垂鑑戒示來世哉我邑侯王公下車伊始刻刻以益民正俗爲念慨世風之不古慮絕學之失傳咨命多士賡續前編予識淺學疎深恐未克勝任貽大雅羞奈斯道攸關不得不竭力維持焉任邑古爲晉地陶唐氏之遺風至今尙在其民之守孝弟務忠信遵禮義崇廉恥者亦旣沿爲舊俗雖國體有變世界有變而人心之守道正未嘗變也爰本此意詳加採訪其自達官顯宦學士文人逸民鄉耆奇男烈女凡有關於孝弟忠信禮義廉恥者莫不搜集補錄以光卷帙卽如疆域地利水陸物產人工製造以及新

政設施舉可以助成一邑之富庶以養成孝弟忠信禮義廉恥之風者亦皆備載靡遺俾後之覽者撫遺牒懷往事有以興起其孝弟忠信禮義廉恥之心則志之有裨於桑梓者孰大於是孔子曰道不遠人人之爲道而遠人不可以爲道吾亦曰志不遠道人之爲志而遠道不可以爲志斯卽續志之本旨也夫是爲序

民國四年一月十八日卽舊曆甲寅十二月初四日邑人前清舉人劉書旂撰

凡例

一志書之作以爲民也故凡有關地方利病生民休戚者但有足徵悉從甄錄隨事立論亦卽以此旨爲宗

一體例所存貴明統系茲則統以八門復就各門詳分子目事以類從文因事繫綱領旣得條目咸釐

一圖學近最發明然欲以米突之尺求若干萬分之一可供新學考證難資舊學研求茲仍計里開方循方定位庶城鄉遠近川澤短長展卷披圖瞭如指掌

一地理多詳分野而其理實未易言微論地球旋轉難拘以何度何方卽準天動地靜而言則昴畢高懸豈專斯境茲故詳

經緯而略星躔氣候至分庶堪推測

一沿革僅志大凡疆域只詳現界其統部之或合或分舊境之爲贏爲縮非關宏旨無事駢枝

一山脈河流爲地理所必要而本境則平原坦蕩河道紛歧水溢旱乾皆關民瘼故凡滌源疏委建閘開渠孰便地形孰資民力利害所繫不厭求詳

一人因地著村落始成其有築堡以衛民建坊以表里旣歸連類無取更端至古迹留遺何鄉傳播亦從附識聊助雅談

一物產因地而生風俗隨地而異爰稽厥類當附茲篇然考名義於葩經溯流風於史傳徒矜學識何與民生茲則撮物產